



說略卷之七

史別上

江寧顧起元太初輯

帝王世紀云黃帝次妃女節生少昊則少昊乃黃帝

子也是傳位與子自黃帝始而非起於夏禹家語五

帝德及書序注顯帝紀并通曆皆云顯帝爲昌意子

則亦黃帝孫也是少昊傳位於姪史記家語皆云帝

嚳祖元嚳父螭極又高辛紀書序注與帝王世紀載

嚳爲黃帝曾孫則顯頊傳位與從姪大戴禮并史記

說略

卷之七

云帝嚳下妃生摯則高辛又傳位於子高辛次妃慶

都生堯則摯又傳位與弟史記并舜典疏以舜爲黃

帝八代孫則堯傳位於五世姪孫前漢律曆志載顯

帝五世生鯀則舜傳位於六世祖之從兄弟如是則

五帝亦可謂家天下今遡五帝之上而觀之禮記注

云女媧承伏羲而淮南子覽冥訓注古天子姓風則

亦伏羲之子孫也禮記國語皆云炎帝少典之子而

家語與史記云黃帝有熊國君少典之裔子國語又

云黃帝炎帝之弟則二君同是少典之子以此而觀

家天下其來遠矣或曰夏之十七君皆姓姁商之三  
十君皆姓子周之三十七君皆姓姬非如五帝之異  
姓曰不然五帝之時世變不同人各自爲一姓故黃  
帝姓公孫而少昊黃帝子也改姓已顓帝亦黃帝孫  
也乃姓姬堯寄於伊長孺家從母所居故姓伊耆舜  
生姚墟故姓姚稷契與堯同父兄弟也而稷姓姬契  
以簡狄吞玄鳥卵而生故姓子若以異姓而論謂黃  
帝與少昊非父子而堯與稷契非同父之兄弟可乎  
或曰家以傳子今五帝獨黃帝高辛傳位於子少昊  
說略

顓帝皆與姪而摯則與弟蓋已非傳子矣堯傳之曾  
姪孫而舜又傳之同六世祖之從兄弟服紀尤爲差  
遠曰不然長子考監明旣以罪死而放齊固嘗薦次  
子朱啓明矣堯未嘗不欲傳子朱之不肖不足以嗣  
位堯則擇同宗之姪孫而授之舜亦不敢遽然以爲  
君而猶避朱於南河舜亦未嘗不欲傳子商均不肖  
不能以繼緒舜則擇同宗之從兄弟而傳之禹亦不  
敢冒然以爲君猶避商均於陽城堯舜豈以異族而  
授之天下哉且如商之外丙傳弟仲壬仲壬傳姪太

甲小甲傳帝雍巳祖辛傳弟沃甲沃甲傳姪祖丁祖  
丁傳堂弟南庚南庚傳堂弟陽甲祖庚傳弟祖甲廩  
辛傳弟庚丁而周懿王傳弟孝王康王傳弟定王則  
商周亦有傳弟姪者其後如漢惠傳弟文帝昭帝傳  
姪孫宣帝成帝傳姪哀帝哀帝傳從弟平帝東海殤  
帝傳堂兄安帝若冲帝傳質帝則同高祖之從兄弟  
質帝傳桓帝則又同五世祖之從姪比之舜禹蓋無  
異也且以祭法觀之周則祖文而宗武商則祖契而  
宗湯夏則祖顓帝而宗禹而舜則祖顓帝而宗堯若  
說略

卷之七

三

舜爲異姓之國奚必宗堯哉蓋曰弟曰姪曰姪孫旣  
皆吾之族類不謂之家天下不可也

世言神農生而九井自出按九井在賴山荊州記云  
江夏隨縣北界厲鄉村南重山也井在山北重塹周  
之廣一頃十一畝內有地云神農宅神農生此神農  
旣育九井自穿舊說汲一井則八井皆動寰宇記在  
縣北百里人不敢觴按今惟存一穴大木旁蔭人卽  
其處爲神農社年常祀之亦引荊山記所言厲鄉村  
厲山下之穴神農所生穴口方一步容數人上有神

農廟卽荊州圖永陽縣西北二百三十里厲鄉山東石穴也高三十丈長二百丈謂之神農穴神農生於厲鄉者老子亦生於此故崔氏瀨鄉記以爲老子敎堂之故處祇今眞源老子祠北三里有李母祠門內東院有九井述征記云汲一則八動然當塗南十里又有九井山伏滔記丹陽山南有九井五乾四通大江寰宇記穰之九井與江寧三井皆汲一則餘俱震而廣濟之靜林院亦有九井攷之院記乃開成中宗義所鑿爲陰竇使相通引東巖水注之卽今之九井

說略

卷之七

四

寺因之巖井之相通附會者非一矣且若江寧三井在城南五里三井岡而縣復有烈山烈洲臨江中流上有神祠記或以爲烈山氏之古迹乃伏滔記云栗洲也其上有小山如栗王敦舉兵所至者輿地志云吳之舊津是矣內有小水商客停舟以避烈風而名亦曰溧洲非古之烈山也

羅泌路史云子游炎陵過西陽之鄉值雲陽老期我山中觀赤松軒轅之壇寺後山之頂爲歲祈所赤松子者炎帝之諸侯也旣耄移老襄城家於石室故齊

孔稚玄館碑云赤松家於石室之下神農行弟子之  
敬今襄陽之境也而說者乃以爲東陽之石室山故  
東陽記北山去郡三十里有赤松廟赤松澗云昔徐  
公遇赤松於此而酈氏水經亦謂赤松子遊金華山  
自燒而化故今山上有赤松壇載稽非也乃皇初平  
爾初平亦赤松子也炎世赤松迹在襄陽不在於此  
按習鑿齒襄陽傳蔡陽界有赤松子亭下有神陂卽  
南都賦所謂松子神陂者也神仙傳云赤松子者服  
水玉神農時爲雨師教神農入火炎帝少女追言與  
之俱仙高辛之時復爲雨師而列仙傳有赤松輿子  
者在黃帝時啖百草華不穀至堯時爲木工故傳爲  
帝佶師之又云堯師之而道亦有黃帝問赤松子中  
戒等經此張良所以願從之游非末代之數矣然今  
西蜀峨眉衡陽在在俱有赤松壇壘豈其所寓邪雲  
陽之迹邇於炎陵可得而詳也

玄囂少昊青陽三人也說者以玄囂爲青陽或以青  
陽爲少昊或合以爲一人皆非也按春秋緯黃帝傳  
十世雖未足信然竹書紀年黃帝至禹爲世三十以

今考紀亦十有二世昔漢杯育治始終黃帝而來至  
元鳳之三年凡三千六百二十九載黃帝後有帝鴻  
有帝魁有青陽有金天而後乃至高陽金天少昊俱  
爲青陽之子攷之書則無疑質之世則不詭青陽玄  
囂自二人明矣司馬遷作史記不紀少昊略不識其  
所出而言玄囂不得居帝位夫少昊矩度顯在人目  
三代以來皆所專用祀於五帝之位正於月令之次  
德之在人如是之著而玄囂不得居帝位則玄囂非  
少昊明矣史記云黃帝生玄囂是爲青陽降居江水

說略

卷之七

六

此太史公之誤也黃帝之子二十五宗賜姓十二惟  
紀有二餘十有三皆姬姓也青陽與夷彭同爲紀性  
玄囂與蒼林同爲姬姓少昊生於青陽循其紀姓帝  
嚳出於玄囂循其姬姓世本紀姓出於少昊而帝嚳  
之子帝堯猶襲姬姓氏姓之來各有派別則玄囂青  
陽又不得爲一明矣夫玄囂降居江水青陽安得有  
降居江水之事蓋太史公統紀二人皆出黃帝而並  
列其文稍錯誤宜曰生玄囂青陽玄囂降居江水爾  
曹子建之贊少昊也亦稱祖自軒轅青陽之裔則少

昊爲黃帝之孫而青陽之後矣惟帝德攷云黃帝之子少昊曰清又曰清者青陽也其子曰摯茲太史公所以致學士之疑者蓋取乎此少昊二字自是傳者之誤贅也是以張衡條遷固違誤謂帝繫說黃帝產青陽昌意與周書異而郭璞亦云少昊金天氏帝摯之子也然以摯爲青陽之名則又誤矣

禳架之事從古而有今人家正旦門設神茶鬱壘爲說漫汗按風俗通引黃帝稱上古有兄弟二人曰茶曰鬱律在度朔山桃下簡百鬼妄滑人者援葦索執

說略

卷之二

七

以食虎而漢舊儀乃引山海經云神茶鬱壘二神人主執惡害之鬼黃帝乃立桃人於門戶畫茶壘與虎索以禦鬼其爲說蓋如此獨風俗通作鬱律戰國策又作余與鬱雷厥義同也故集韻中壘音爲律蓋神茶者伸舒也而鬱律者苑結之謂也周代多以茶爲舒如公子茶夏后茶是也西京賦云雷鬱律於岩突聲鬱屈也沈休文云鬱律構丹巘形鬱屈也而黑深又爲黼黻王充亦云禮刻尊爲雷形一出一入爲相校較之狀蓋律鬱者喂嶮之類也相校較則鳴分裂



魄然若敝裂者氣射之聲也鬱律忽發中人則死其引山海經鬱壘與舊義同惟括地圖言二神曰鬱曰律則失之矣且黃帝內傳云黃帝始儼而莊子有游島問於雄黃逐疫出魃擊鼓呼噪與黃帝立巫咸之事則神荼鬱壘爆竹之事可知矣

世本云蒼頡作書司馬遷班固韋誕宋忠傳玄皆言蒼頡黃帝史官崔瑗曹植蔡邕索靖言古之王也徐整言在神農黃帝間譙周言在炎帝時衛氏言當在庖犧蒼帝之世慎到言在庖犧前張揖言其爲帝王

說略

卷之二

八

生於禪通之紀路史亦云然按元命包倉帝史皇氏名頡姓侯岡治百有一十載河圖玉版云倉頡爲帝南巡狩登陽虛之山臨於玄扈洛汭之水靈龜負書丹甲青文以授之此皆言倉頡是帝王世紀言黃帝史官倉頡孔甲呂氏春秋說文通志略皆同世紀迄未有的論也今蒼頡墓白水縣南樂縣祥符縣壽光縣皆有之元命包言葬衙之利鄉亭衙卽白水述異記倉頡墓在北海壽光亦北海地未知孰是

漢孔氏註九黎之君號蚩尤史記蚩尤在炎帝之末

楚語九黎在少昊之末孔註又言蚩尤爲黃帝所滅  
與史記同孔見楚語而爲此說蓋以蚩尤是九黎之  
君黃帝雖滅之種類尚在故至少昊末復作亂康成  
曰九黎學蚩尤蚩尤霸天下者孔氏三朝記曰蚩尤  
庶人之貪者應劭云蚩尤古天子諸說不同今考黃  
帝滅蚩尤於涿鹿之野在北鄙南蠻多黎種九黎三  
苗皆南蠻蚩尤九黎非一種也楚語云三苗復九黎  
之惡苗與黎同種康成亦云三苗即九黎之後顓頊  
誅九黎其子孫爲三國高辛衰復爲亂堯又誅之舜  
攝位又竄之禹攝位又征之

訖略

卷之七

九

蚩尤天符之神狀類不常三代彝器多著蚩尤之像  
爲貪虐者之戒其狀率爲獸形傳以肉翅蓋始於黃  
帝龍魚河圖云黃帝之初有蚩尤氏兄弟七十二人  
銅頭鐵額食沙石制五兵之器變化雲霧演義云漢  
武時太原有蚩尤神晝見龜足馳首疾其里人遂立  
祠齊魏間太原村落中祭蚩尤神尚不用牛頭述異  
記冀州有蚩尤神俗謂蚩尤人身牛蹄四目六手涿  
鹿間往往掘得髑髏如銅鐵蚩尤骨也齊梁間尚有

蚩尤齒長二寸堅不可碎秦漢間說蚩尤牛耳鬚如  
劍戟有角與軒轅鬪以角觝人人不能向冀州舊樂  
名蚩尤戲其人兩兩三三戴角而相觝卽蚩尤之制  
又按俗稱關羽死後爲神有破蚩尤於鹽池事今山  
西解州是寰宇記云蚩尤之封域有鹽池之利王水  
黃帝經序云其血化爲鹵今之解池是也方百二十  
里鹵色正赤故呼解池爲蚩尤血則俗稱雲長云云  
亦有自來矣

蜀記杜宇末年遜位鰲令鰲令者荆人也舊說魚鳧  
說略

卷之七

十

畋於湍山仙去後有男子從天墮曰杜宇爲西海君  
自立爲蜀王號望帝徙都於郫或瞿上自恃功高諸  
王乃以褒斜爲前門熊耳靈關爲後戶玉壘峨眉爲  
城郭江潛綿洛爲池澤岷山爲蓄牧南中爲園苑時  
鰲令死尸隨水上荆人求之不得至蜀起見望帝望  
帝以之爲相後禮以國去之隱於西山民俗思之時  
適二月田鵲方鳴因號杜鵑以志其隱去之期一云  
宇檀之而淫其妻恥之死爲子雋故蜀人聞之皆起  
曰我望帝也杜甫每每起歎所謂杜宇曾爲古帝王

者据風俗通等鰲令化從井出既死尸逆江至岷山下起見望帝時巫山擁江蜀洪水望帝令令鑿之蜀始陸處以爲刺史號曰西州自以德不如今從而檀焉是爲蜀開明氏年號萬通生蘆保亦號開明時武都出五力士輔之開明子孫八代都郫九世至開明尚始去帝號稱王治成都自開明五世開明尚始立宗廟於蜀則猶在五帝時以今蜀記望帝遠記周襄王至鰲令王蜀十一代三百五十年當始皇時號蜀蘆子霸王夫始皇時蜀滅久矣記言儀錯伐蜀蜀王

說略

卷之七

二

開明拒戰不利退走武陽獲之樂史云在彭山縣則是張儀滅之也鰲水名也字一作鰲音別縣在牂牁集韻音幣而刺史乃秦官故王充劉知幾以子雲之紀杜魄荆尸爲妄鰲令亦作鼈靈墓在郫西五里外紀有十日並出之說羿射落其九人以爲誕古今通占鏡云衆日並出天下分裂百官名設政令不行三日並出諸侯爭洪水出晉建興二年正月辛未三日出西方而東行後江東改元劉聰李雄作亂四年三日復出其年帝蒙塵平陽五年正月庚子三日又

見占曰三四五日見天下兵王者如其數建武元年亦嘗三日並矣見晉陽秋而太興三年五日且出後前秦後趙乘時並起貞觀之初突厥亦記五日並見乾符六年十一月朔兩日出鬪三日乃沒夫天有十日居於陽谷在黑齒之北一日居上枝九日居下枝次以甲乙迭運中土君有失道則兩日並鬪三日出爭以至十日並出大亂之道山海經云日浴溫原谷上扶桑一日方至一日方出皆戴於烏夏桀之亂兩日並出商紂之世兩日又見其一將沒一方出故攷

訖略

卷之七

十二

靈曜云黑帝之亡二日並照雖然興亡必並有德則興無德則喪此不易之道也顯德七年正月癸卯兩日固嘗見矣是時苗從訓從太祖出師見日上復有一日久相摩盪曰天命也及夕六軍推戴繇此觀之胤甲之事蓋有之矣歷代之書志更有多月者梁太清二年正月兩月相承見西方唐志貞觀初突厥言有三月連明攷之乃是當時推爲突厥頡利之應雖云分域然日月正爲中國之占顧得云頡利哉

書中候握河紀云堯卽政十七年仲月甲日至於稷

沈璧於河青雲起回風搖落龍馬銜甲赤文綠色自  
河而出臨壇而止吐甲迴遘甲似龜廣九尺有文言

虞夏商周秦漢之事帝乃寫其文藏之東序而世紀  
言堯與羣臣沈璧於河乃爲握河紀今中候是也王

元長云握河沈璧孫氏瑞應圖云帝堯卽位坐河渚

神龍赤色負圖而至備載山澤河海之形國土之分

域玄雲篇云龍飛何婉婉鳳翔何噉噉昔在唐與虞時見青雲際此也帝舜祇德欽象

有光至於稷興榮光迭至黃龍負圖卷舒至水畔置

舜前舜與三公大司空禹等三十人集發圖周公踐

說略

卷之七

十三

詐理政與天合志萬序咸得休氣充塞見孝經藩侯

陪位羣公皆就立如舜周公差應差應邪錯在後聖當受神位故近之

至於日昃榮光汨河汨青雲浮至青雲仰玄甲臨壇

止濟止圖滯青龍靈仰之使玄甲所以累圖周公視王公視聖人精明故先

視其文言周世之事五百之戒與秦漢事中候摘洛

古周公旦欽惟皇天順踐詐卽攝七年鸞鳳見黃莢生青龍銜甲玄龍背書以上野王符瑞圖故中

候又云周成王舉堯舜之禮沈璧於河白雲起而青

雲浮乃有蒼龍負圖臨河然据攷之亦黃帝之事爾

以按野王符瑞圖云黃帝軒轅氏東巡省河過洛又

沈握事將加沈璧集曆並臻皆臨諸壇河龍負圖出

赤文象文以授命

象字象時代  
出握河紀

龍魚河圖云天授帝

號黃龍負圖鱗甲光耀從河出黃帝命侍臣寫以示

天下河圖又言黃帝云予夢兩龍授圖乃齋往河洛

求之有大魚沂流而至泛白圖帝跪受之而河圖挺

輔佐曰黃帝持齋七日七夜天老皆從以迎河洛之

書至翠媯之泉大鱸沂流而至問五聖莫見獨與天

老迎之蘭葉朱文五色畢見沈白圖以授帝

見兔  
園策

又

云黃帝游於河洛之間至澤鴻之泉鱸魚負圖以授

說略

卷之七

十四

帝蘭葉朱文名曰錄圖前河圖亦云黃帝游洛水有

鯉長三丈身青無鱗赤文成字故世紀言黃帝時大

震三日帝游洛水上見大魚三牲醮之天甚雨七日

魚流而得圖書則非止握河之說也

世紀云堯時蓂莢夾階而生每月朔則生一莢至月

半而十五莢十六後日落一莢至晦而盡若月小盡

則餘一莢厭而不落王者以之占曆應和氣而生舜

亦如之一名仙茅故田俅子云堯爲天子蓂生於庭

爲帝成曆瑞圖云葉圓而五色日生一莢至十六則

落一莢及晦而盡白虎通義云攷曆得度則生書中  
候摘洛戒云堯舜時皆有之周公攝政七年又生亦  
見伏書大傳或云朱草大戴禮云朱草日生一莢至  
十五日後日落一葉周而復始按孝經援神契云朱  
草生葇莢孳則二物也注朱草者百草之精狀如小  
桑栽子長三四尺枝莖如珊瑚生名山石岩之下刺  
之如血其葉生落隨月晦朔亦如葇莢則葇莢之類  
爾三禮義宗云朱草赤草也可以染絳爲服以別尊  
卑王者施德有常則應德而生光武中元年羣臣奏

說略

卷之七

十五

言地祇應靈而朱草萌生又有赤草生於水涯則非  
葇莢矣云仙茅者誕矣

抱朴子亦云又名仙茅今西  
山謔母所種者頗異它處少  
年湯飲輒致口鼻出血仙茅方云  
明皇服鍾乳不効婆羅門僧進之

唐國今中山之唐縣按輿地廣記堯爲唐侯於此漢  
屬中山國今中山之新樂皆故漢之唐也有堯山唐  
水南有望都城望都里東北有中山故城一曰廣唐  
城張曜中山記云中入城也望都城東有堯故城俗  
呼爲堯姑城世紀以爲慶都山在望都南張晏皇父  
謚皆謂以升堯山南望都山因曰望都相去爲五十



里今在唐縣東北五十四里俗呼孤山一曰豆山而十三州志唐故城在盧奴北七十五里盧奴今之唐也酈元云城去望都城八十去中山城七十推驗宜爲唐城北去堯山五里與七十五里之說合然城南無山以擬都山於是欲以唐城爲望都城而北又無城以應唐城乃以唐城東南十五高昌城爲望都城蓋不知道里之誤也唐之爲名在在有之平陽安邑亦皆曰唐平陽卽晉之臨汾正乃詩之唐國有姑射山按九域志唐水之土地正名翼一曰絳而總曰平陽成王滅之以封叔虞後更曰唐安邑今隸解故絳之翼城城西二十有唐城又并於晉北二里有故唐城寰宇記爲唐堯所築夫平陽乃丹朱之封也徐才國都城記及元和郡縣志皆云翼城唐國帝堯裔子所封而晉陽縣北二里亦有故唐城云堯所築卽燮父之所徙而河北縣南百二十八又有故堯城九域志威勝軍之臨漳城風土記亦云堯築而邢之堯山縣漢之柏人西十二有南蠻古城今相有古柏人城九域記引世紀爲堯都縣東北二十二有柏鄉城故

與趙都柏鄉縣東西中分城冢記言堯所置有堯廟  
謂堯於此贈洪水訪賢人者又河東之南二十八亦  
有堯山上有堯城水經以爲唐堯所理而雷首亦謂  
之堯山有堯祠唐之堯山亦有堯祠張肱齊地記以  
爲巡狩所登而河清西南八十五瑕丘東南七里洙  
西與滑之靈祠皆有堯祠上黨長子亦有堯水堯祠  
集古錄記堯祠碑二皆在濟陰九域志濟陰乃今有  
堯溝而九州記曹爲堯廟堯之所開而名若寰宇所  
記堯迹尤多堯舜之祠天下不勝多矣皆以爲巡狩  
之所記有所不得盡有如東海縣西北三里謝祿山  
上堯廟乃太始七年刺史劉崇之所立自以爲堯後  
爲之此類尤多今荆湖南北江西兩浙桂陽永明二  
水以來祠場不可勝紀

堯之冢在濟陰成陽堯母靈臺在南漢章帝元和二

年使奉太牢祠堯於成陽靈臺是其處也今皆在濮

之雷澤東南

元和郡縣志堯母廟縣東南四里堯陵縣西三里堯卽位至永嘉三年二千七

百二十一年紀載於碑正觀而王充乃云葬崇山墨

十一年禁樵採春秋奠醑子則謂北教入狄道死南已之市而葬蚩山之陰蓋

儀墓爾

論衡曰堯葬冀州或云葬崇山儀墓如漢世遠郡園陵與蒼梧舜墓之類非實葬所山海

經云堯葬狄山之陽鄆善長以爲非亦此類

按歐陽文忠公集古錄言靈

臺碑以爲史記地志水經諸書皆無堯母葬處粵稽地志及范曄志則云成陽有堯冢靈臺而此碑云堯母葬茲欲人莫知名曰靈臺又郭緣之述征記成陽城東南九里有堯陵陵東有中山夫人祠在城南二里蓋堯妃也東南六里有慶都冢上有祠廟而水經注言成陽城西二里有堯陵陵南一里有慶都陵於城爲西南稱曰靈臺鄉曰崇仁邑號修義其葬處明說略

卷之七

一八

自若此惡得云無言邪然述征記在成陽東而今之所識乃在成陽西北四十里穀林則古今疆場相出入有不同者郭氏所記乃小成陽小成陽在成陽西北五十里隸於河南有山曰成陽穀林在其下

高誘注呂

氏春秋云成陽山下有穀林是

小成陽以山得名乃堯葬所在有堯

之故名焉卽庸俗所謂囚堯城者

堯母塚在濮州雷澤縣有碑蓋建寧五年廷尉臣所

建濟陰守宋晃允讓成陽令管遵君臺遣大掾輔助

以成其說感赤龍而生堯則本春秋合誠圖謂慶都

生於斗維之野常在三河東南天大雷電則血流潤  
大石之中生慶都爲黃雲覆蓋葺食不饑許慎嘗爲  
之論曰堯親慶都蓋天帝之女寄伊長孺家年二十  
九無夫出觀於河有赤龍負圖而至曰赤龍受天下  
之圖有人赤衣光面八采鬢髯長赤命帝起成元寶  
及生堯視如圖故眉有八采之色以帝王世紀考之  
堯爲帝嚳子則豈爲無父漢人尚識緯其論每若此  
彼以漢高祖爲雷電感大澤中以生則追叙堯事相  
配且爲堯之後雖帝王之興必有徵祥不應怪詭至  
說略

卷之七

一九

此劉焯嘗謂左氏稱在夏爲陶唐氏其處爲劉氏非  
原史本文乃漢儒欲其傳特爲此語以漢出堯後獨  
左氏爲有明文以此求重於是孔穎達特信其說觀  
此碑與許慎之論則焯之說有所推考之矣

尚書中候握河紀云舜爲太尉故帝王世紀云命爲  
司徒太尉正月以太尉行事按月令命太尉贊桀俊  
鄭注太尉秦官漢志亦云獨應氏官儀以爲周官而  
康成中候注首從其說與禮注相異故東哲据中候  
以追難之正義且因中候之言謂二王有司馬無太

尉以爲堯置之而三王不置予攷春秋元命苞云堯游於河赤龍負圖與太尉舜等百二十人發視之而合誠圖言堯坐舟中與太尉舜等臨觀鳳凰負圖授於堯赤玉爲匣長三尺廣八寸厚寸黃玉檢白玉繩封兩端章曰天赤帝符璽而春秋運斗樞亦云舜以太尉之號卽天子五年二月東巡狩中舟與三公諸侯臨觀河黃龍五采負圖出置舜前甞入水而前去黃玉爲匣長三尺廣八寸有戶白玉檢黃金繩芝泥封兩端章曰天黃帝符璽烏文舜與大司空禹臨侯

說略

卷之七

二十

博望等三十人集發圖玄色綿長三十二尺中有七十二帝地形之制天文位度之差藏之大麓而河圖所云與此略同則其爲說久矣然呂氏書孟夏命大封贊桀不云太尉黃帝時大封爲司馬是太尉也

周之

大司馬至秦而爲太尉漢武復爲大司馬東漢復爲太尉尉者自上安下之辭周官大司馬職進賢興功以作邦國王制司馬辨論官材皆贊桀遂良之事 劉昭以爲緯候之書貴尚

神鬼動挾怪誕太尉官實司天虞舜作宰璿衡賦政當是据位以書前職非虞氏之實號蓋太尉之職實舜所掌遂以職同而追稱之非官之繆康成自注中

候至於禮學豈遂忘帝之職位哉蓋亦知之不發之中候而發之月令耳

西王母西方昏荒之國也在爾雅爲四荒之名据大戴禮三朝記孔子之言昔西王母獻舜白玉琯及益地圖注言神也亦見書帝驗期及世紀世本乃云獻白玉環及玉佩禮斗威儀云獻地圖及玉玦集仙錄又言黃帝在位西王母使乘白鹿授地圖舜帝在位使獻白玉環及益地圖舜遂廣九州爲十二復獻白玉之琯以和八風故章帝時零陵文學奚景於中道

龍略

卷之七

二二

舜祠下得笙白玉之琯風俗通漢晉諸史呂覽樂書皆備言之說文堯舜祠下得笙玉琯蓋皆以玉作琯故能使神人和鳳來儀也竊按諸書言舜時瑞事尤多如金樓子言舜攝時有綏耳貫胷民獻珠鰕拾遺記言羽民等獻黃布火浣之類多不足質按竹書穆王七年西王母來賓特不過西戎爾大曆六年試西戎獻白環詩指此

孟子曰舜生於諸馮

卽春秋之諸浮冀州之地

遷於負夏

衛地

卒於

鳴條東夷之人也

在河中府安邑或云陳留平丘有鳴條亭然湯伐桀與三隴昆吾同

時三臆在定陶鳴條義不得在陳留又安邑有昆吾亭顯其非是也諸馮負夏鳴條皆

在河南北故葬於紀所謂紀市也紀在河中市皮氏今帝墓

在安邑而安邑有鳴條陌去紀才兩舍竹書郡國志

等皆言帝葬蒼梧則自漢失之禮記是至鄭康成遂以

鳴條為南夷之地孟子言諸馮負夏鳴條伊訓言亳鳴條三臆皆衛晉之地豈得越在

南夷哉故實革云舜卒鳴條去所都蒲阪七十里無緣葬於蒼梧四千里外而司馬攷異乃謂蒼梧為在

中國非必江南然無明文且謂江南柳又踈矣夫蒼梧自非五服人風嫫劃

地氣高瘴在虞夏乃無人之境豈巡狩之所至邪方

堯老舜攝也於是乎有巡狩之事今舜既已耄期釋

說略 卷之七 三十一

負而付禹豈復躬巡狩於要荒之外哉是以劉知幾

之徒得以撫厲王流彘楚帝遷邳及夏桀趙嘉之事

而疑舜禹之明德嘗攷之象封有鼻今道州故墓在於

始興幽明錄云始興有鼻天子冢鼻天子城卽南康記南康縣鼻天子城者亦見實賓錄蓋地後貫

南康昔人不明為何人乃象冢也義均封於商故女英之冢在商事見

劉禹錫嘉話廣紀等世紀云舜三妃娥皇無子女英生商均女英蓋隨子均徙於封所而死葬焉其

餘支庶或封巴陵或食上虞采西城邑池陽與夫懷

戎衡山長沙無錫故其墓或在江華或在巴陵上虞

荆湖兩浙虞帝之迹徧所在有風土記上虞有舜塚郡國志云上虞東有姚丘舜葬之所東又有谷林云

舜生之地復有歷山云舜耕于此而嘉禾降之又越之餘姚餘姚山記以爲舜父所封而風土記乃云舜支庶之所封又會稽山有虞舜巡狩臺臺下有望陵祠云民思之而立風土記云舜東夷之人生於姚丘媯水之汭損石之東今姚丘山在餘姚西六十上虞縣之東本作桃丘又始寧界有舜所耕田始寧乃故上虞之南鄉也今有吳北亭虞濱皆在小江裏去縣五十對小江北岸臨江山上有立石謂之損石俗呼薦公嶺又餘姚有漁浦湖輿地寰宇記以爲舜漁於此沈穆謂湖今在上虞而今冷道乃有舜廟徐儉碑謂是舜之所都而營浦南亦記有舜巡宿處而道州學西有虞帝廟管其它蓋不勝記如營道廟舊在太陽溪溪今不知處漢以來廟九疑山下至唐不存元結建之州西置廟戶刻表勅并狀僖宗時士胡曾權延唐始復之九疑宋初王繼勳奉詔修歲春秋降祠版蓋皆其後祠之

禹爲天下帝之

諸子分適它國其之巴陵者癸比氏蓋從之故其墓

說略

卷之七

二十三

在於巴陵

黃陵也癸比氏帝之第三妃

帝之三妃不得皆後於帝

死盲既葬於陳倉則其先死矣

盲卽娥皇漢志陳倉有黃帝孫舜妻盲冢

既黃英各自有墓則黃陵爲癸比之墓審矣

世以湘陰黃陵

爲舜妃墓而臨桂縣城北十餘里有雙女冢高十餘丈周二里亦云二妃之葬俱繆今江華太平鄉有舜

寺湘陰有大小哀州圖經以爲二妃哭舜而名亦妄特舜女也虞帝之墳在在有之

海內南經蒼梧山帝舜葬其陽大荒南經帝舜葬岳山又海內北經有帝舜臺之類有靈臺

蓋古

聖王久於其位赴格之日殊方異域無不爲位而墳

土以致其哀敬非一所也顯譽堯湯之墓傳皆數出

漢遠郡國皆起國廟亦若是也是則九疑之陵或第



象之國所封崇爾

漢惠帝元年令郡國諸侯王立高廟至元成時郡國祖宗園廟百六

十七所自高祖至悼皇考各居陵旁立廟并京百七十六園中各有寢便殿

不然商均窳

也大荒南經云赤水之東蒼梧之野舜子叔均之所

葬九疑山記亦謂商均窳其陰豈非商均徙此因葬

之後世遂以為虞帝墳邪

山海經古書也第首尾多衡決後世不攷按海內朝

鮮記云南方蒼梧之東其中有九疑山舜之所葬在長沙零陵界中此後人所增長沙零陵名出秦漢非

古明也

又攷大傳符子之書虞帝遜禹於洞庭張樂成

於洞庭之野於是望韶石而九奏則帝蓋嘗履洞庭

而樂韶石亦既遜位而歸國矣

遜禹後十八載乃崩九山皆石巖聳特立

說略

卷之七

二十四

亦謂之韶石

故集仙錄言帝得修身之道治國之要瞑目

端坐冉冉乘空而至南方之國入十龍之門泛昭回

之河其中有九疑山焉歷數既往歸理茲山是則九

疑之游特夢想之所屆者是以蔡邕九疑碑乃云解

體而升而胡曾九疑碑圖且謂今無復墓然則蒼梧

之藏有其語而已矣

真源賦云因南狩走馬逐鹿同飛蒼梧莫知所去蓋誕

河

中之壠焉可誣也世遠論略李白云重瞳孤墳竟何

是則虞帝之冢不明自昔以為恨也

王充謂舜禹皆以治水死葬於

外按是時水平已久柳燦闢劉知幾之說當矣然謂舜因天下無事肆觀南巡零陵桂林不期奄化而因

葬之至比始皇孝武帝之崩書云陟方乃死說者  
載歸路寢而後成禮又大妄矣  
以陟方爲巡狩孔氏謂升道南方以死韓愈非其說  
曰地傾東南南巡非陟也陟者升也方乃死者所  
以釋陟爲死者蘇軾亦謂陟方猶升遐乃死爲章句  
後學誤以爲經文書云商禮陟配天惟新陟王故汲  
紀年帝王之沒皆曰陟然則在位五十載陟者爲紀  
帝之沒明矣

唐世紀錄張尚書牧弘農鞠盜有嘗發商州堯女墓  
者多得大珠鏐金寶器玉盃厥事甚顯公獨怪其史

說略

卷之七

二十五

傳茂記又謂堯女舜妃從死湘嶺不得在是且以玉  
盃寶珠非協茅茨之事一時名流劉禹錫輩亦舉爲  
疑微達識之義矣攷之舜子商均本曰義均見於山  
海經以其封商而謂商均商正今之商州按帝王世  
紀云虞帝三妃娥皇無子女英生商均今女英之冢  
在商則特舜崩之後隨其子均徙於封所故其卒葬  
在焉事允協矣又奚史傳之記不記哉彼亦豈知虞  
帝未始南巡與二妃初無從巡溺死之事皆記禮者  
之妄爾夫果帝以南巡二妃於時皆逾百歲豈得謂

女兒復此俱存哉堯舜固儉也然寶玉之類亦非必  
爲深怪南陽張誕澹墓碑陰刻白楸之棺易毀之裳  
銅鐵不入瓦器不藏嗟爾後人幸勿我傷元嘉旣發  
甚多金器垂簾一皆金釘飾之先漢文帝勅治霸陵  
一皆瓦器不得以金銀銅鐵爲飾故魏晉羣盜發掘  
陵埡而霸陵獨得不扣至元康間三秦人尹桓解武  
始發霸陵獨得潛闖之中金玉粲煉絲此觀之則商  
墓之藏可理知矣况堯舜之儉朱均固未守也式求  
劉向當時對成帝者則霸陵之事固不得甚薄也况

說略

卷之七

二十六

商均乎

岳之黃陵癸比氏之墓也湘之二女虞帝子也歷世  
以爲堯女舜妃者繇秦博士之妄對始癸比氏虞帝  
之第三妃而二女者癸比氏之出也一曰宵明一曰  
燭光見諸汲簡皇甫氏之世紀山海經言洞庭之山  
帝之二女居之者也若九歌之湘君湘夫人則又洞  
庭山之神爾而羅含度尚之徒遽斷以爲堯之二女  
舜之二妃而以黃陵爲二妃之墓鄭玄張華酈道元  
輩且謂大舜南巡二妃從征溺死湘江神游洞庭之

山而出入乎瀟湘之浦爲是說者徒見堯典有二女之文卽以爲堯之女而舜之妃不復致攷厥妄甚矣郭景純云堯之二女舜之二妃豈應降小水而爲夫人當爲天帝之女斯亦繆者夫使天帝之女尤不應降小水而爲夫人王逸韓愈從而辨之得其情矣且虞帝晚年亦旣退聽而禪禹矣南狩之舉總之伯禹而二妃者俱過期頤孰有從狩之事哉今攷皇英之冢旣各它見則此黃陵顯非二妃之窆而湘祠決匪堯女之靈皆昔人之罔說明矣山海經云舜之二女

說略

卷之七

二十一

處河大澤光照百里夫大澤者洞庭之謂而光照者威靈之所暨也訖今湘神所寶靈正百里所謂分風送客者乃正圃一同之間然則湘祠爲虞帝之二女復何疑邪沈存中云陟方之時二妃皆百餘歲豈得俱存而且謂之二女乃復不知位旣久禪匪復陟方之事邪黃伯思輩雖能以退之之辨爲非然猶以爲天帝之女與翁養源於湘江圖志述之斯亦惑矣紛紛失据以爲舜女蓋自今始

黃閔武陵記云武山半石室可容數萬人中有石床

槃瓠行迹辰州圖經云隍石窟如三間屋一石狗形蠻俗云槃瓠之像按伯益經云卞明生白犬是爲蠻人之祖卞明黃帝氏之曾孫也白犬者乃其子之名蓋若後世之犬子豹奴虎狔虎犢云者非狗犬也然經又言卞明生白犬白犬有二自相牝牡郭氏以爲自相配合蓋若今之婆羅門半釋迦者而應劭書遂以爲高辛氏之犬名曰槃瓠妻帝之女乃生六男六女自相夫婦是爲南蠻則知其說原衍於此是殆以白犬爲厖爾至郭璞張華干寶范曄李延壽梁載言說略

樂史等各自著書枝葉其說人以喜聽而事遂實矣且其說曰高辛氏募有得犬戎吳將軍首者黃金千鎰邑萬家妻以少女杜君卿固疑其誕謂黃金古以斤計至秦始皇曰鎰一也三代分土漢始分人古安得萬家之封二也將軍周末之官三也吳姓宜周始有四也佑之難亦當矣又引其獄中與諸甥書證之然不知其說之不出乎曄也夫人畜之交通世蓋每有昔元嘉中孟慧度之婢與犬通處者且逾年事具宋書志槃瓠者特獬狘之轉爾按玄中記槃瓠浮之東

南海中是爲犬封氏蓋因本風俗通然亦不謂其爲蠻人之祖也

夏后氏生而母化爲石此事之異聞者說見世紀蓋原禹母獲月精石如薏苡吞之而生禹也淮南之修務云禹生於石注謂修已感石坼胸而生故說者以爲夏后生而母復爲石今登封東北十里有廟廟有一石號啓母石應劭劉安郭璞李彤隨巢王炯王韶竇莘等皆云啓母歷代崇祀亦以爲之啓母按元封元年武帝幸緱氏制曰朕用事華山至中岳見夏后

說略

卷之七

三九

啓母石伏云啓母化爲石啓生其中地在嵩北有少室媯神廟登封北十二里云啓母之媯而偃師西二十五復有啓母小媯行廟淮南子禹通轘轅塗山欲餉聞鼓乃來禹跳石誤中鼓塗山忽至見禹爲熊慙而去至嵩山下化爲石禹曰歸我子石破北方而生啓蓋本乎此事正與廣德所祠烏程張渤疏聖河夫人李餉至鳴鼓事正同見事實及桐汭志漫錄等故記以爲大禹之化厥有繇矣雖然啓母之廟顧野王盧元明等又以爲陽翟婦人嵩高記云陽翟婦姪三

十月子從背出五歲入山學道爲母立祠曰開母祠則又疑后母矣按遁甲開山圖又言上古女媧十九代孫大禹壽三百六十歲入九嶷山飛去後化生於石紐山泉女狄暮汲水得石子如珠愛而吞之有娠十四月生子代父治水堯舜以其功如古大禹乃賜號禹此又與世紀之說異

伯益卽伯翳也秦聲以入爲去故謂益爲翳也字有四聲古多轉用如益之爲翳契去聲之爲尙入聲臯之爲

咎

去聲

君牙之爲君雅是也此古聲之通用也有同音

說略

卷之七

三十一

而異文者如陶之爲繇垂之爲倕繇之爲鮫虺之爲備紂之爲受罔之爲驛是也此古字之通用也太史公見書孟子之言益也則五帝本紀言益見秦記之爲翳也則秦本紀從翳蓋疑而未決也疑而未決故於陳杞世家之末又言垂益夔龍不知所封則遂謬矣胡不合二書而思之夫秦記不燒太史所據以紀秦者也秦記所謂佐禹治水豈非書所謂隨山刊木暨益奏庶鮮食者乎所謂馴服鳥獸豈非書所謂益作朕虞若予上下鳥獸者乎其事同其聲同而獨以

二書字異乃析一人而二之可謂誤矣唐虞功臣獨四岳不名爾而姜姓則見於書傳甚明也其餘未有無名者夫豈別有伯翳其功如此而反不見於書史記本紀世家及總叙之謬如此不特此也重黎二人而合爲一則楚有二祖也四岳爲齊世家之祖而總叙齊人伯夷之後則齊又二祖也其乖刺如此而羅氏路史因之眞以益翳爲二人又以柏翳爲皐陶之子則嬴鄆李三姓無辨矣且楚人滅六之時秦方盛於西徐延於東趙基於晉使柏翳果皐陶之子臧文說略

仲安得云皐陶不祀乎又以益爲高陽氏之才子隕斂至夏啓時則二百有餘歲矣夫堯老而舜攝舜耄期而薦禹禹且老而薦二百歲之益以爲身後計非事實也

賢臣刻名於琬琰故名琬琰錄然竹書紀年云后桀命扁伐岷山氏岷山氏女於桀二人焉曰琬曰琰桀愛之斲其名於苕華之玉苕是琬華是琰則琬琰之刻非佳事也又云棄其元妃於洛曰妹喜氏以與伊尹交遂以夏亡則妹喜以棄而亡國非以嬖而亡國



也

劉子政說湯無葬處崔駰薛瓚俱云濟陰亳縣今有湯冢皇覽云在亳城北郭東三里高七尺韓嬰所謂帝乙墓者何謂無邪按伏滔北征記博望城內有湯伊尹及箕子冢今悉成丘杜征南亦云梁國蒙縣北薄伐城中有湯冢其西有伊尹箕子冢今城內有故冢方城宜其爲是而記乃稱王子喬墓亳之湯冢已名之伊尹冢顏籀亦固疑之爰求徵地則又別有湯冢漢建平元年大司空史御長卿按錄水災行湯冢

說略

卷之七

三十二

者於漢隸扶風地有湯池徵陌何謂無邪然湯都亳與葛比似亦不在茲土及攷秦寧公本紀二年伐湯三年與亳戰亳王奔戎遂滅湯則知周穆桓之特別自有湯亦號亳王爲秦所滅乃西戎之君葬於徵者而非成湯之墓繼觀聖賢成冢記湯之冢後魏天賜中已圯矣銘言二千年困於恩其明器悉爲河東張恩靈之於河是知成湯之冢已不復存子政之言爲不苟矣

周公叙商六臣言高宗時有甘盤而不言說何也正

義云高宗未立之前已有甘盤免喪不言乃求傳說漢儒以爲卽位初有甘盤佐之甘盤卒後有傳說說有大功周公數六臣不言說未知其故蓋此六臣皆商前王舊臣輔後王者說乃高宗所求非其父小乙所遺之臣也周公留召公專述舊臣故數盤而不及說耳

說命曰說築傅岩之野孔氏傳云傅氏之岩有澗水壞道常使胥靡刑人築護此道說賢而隱代胥靡築之以供食至蔡氏不從其說乃云築居也今言所居

說略

卷之七

三十三

猶謂之下築按孔子語子路云傳說負壤土釋板築而立佐天子孟子云傳說舉於版築之間莊子云傳說胥靡墨子云傳說被褐帶索庸築傅岩屈原離騷云說操築於傅岩賈誼鵬賦云傳說胥靡兮乃相武丁班固公孫弘贊云版築飯牛之朋崔駰達旨云役夫發夢於王公張衡應閒云委甬築而據文軒夏侯湛抵疑云傳說操築以寤主羊祜讓開府表云有遺德於版築之下郭璞三蒼解詁云板牆上下板築杵頭鐵杵也王子年拾遺云傳說賃爲赭衣舂於深山

以自給蕭綺序錄云傳說去其春築釋彼傭賃應翹  
旌而來相沈約恩倖傳云版築賦役也傳說去爲殷  
相右諸說皆遠出蔡氏前並同孔傳且孔孟莊墨去  
殷皆未大遠言必有據不知蔡氏何所見而不從也  
帝乙長子曰微子啓啓母賤不得嗣少子辛辛母正  
后立爲嗣史記之文也以母賤對母正后言之是二  
母明啓與辛非同母之所生也前此呂氏春秋載紂  
之母生微子又生仲衍其時尚爲妾已而爲妻生紂  
是太史遷之所記者非也而帝王世紀曰帝乙有二

說略

卷之七

三十四

妃正妃生三子長曰微子啓中曰微仲衍小曰受庶  
妃生箕子年次啓皆賢初啓母之生啓及衍也尚爲  
妾及爲后乃生辛帝乙以啓賢且長欲以啓爲太子  
史據法爭曰有妻之子不可立妾之子帝乙乃立辛  
爲太子夫史爭之辭若果有之曰妾曰妻是謂二人  
若直謂啓與辛皆帝乙在微時正妃所生之子則帝  
乙旣卽位正妃得爲后矣妻得從夫以貴而所生之  
子不得從親皆貴乎微子啓不得稱嫡長子乎大紀  
論乃曰帝乙泥於立嫡而不知受之足以亡天下也

亦不慎不知變之過吾不知其何也余謂事仍當以史記爲正呂氏春秋世紀或出傳聞之異辭耳

文王十三而生伯邑考十五而生發則武王之生乃庚丁三年甲辰也文王至紂十五年而始得呂尚則武王巳年七十六七矣而云娶呂尚女邑姜豈其父方十二卽冠而娶太姒顧其子反老耄而始婚邪非人情也亦非禮也竹書紀年言武王實得年五十有四攷其在位僅五年而崩若如禮記文王與齡之說武王崩年九十有三文王崩年九十有七相去纔四

說略

卷之七

三十五

年文王之生武王纔四五歲爾生伯邑考又是何時羅泌路史所以辨其必不然錢公輔語王安石云武王聖人八十尚無太子此盡信書所以不如無書也禹爲夏契之後爲商而稷之後爲周夏十七世商三十世蓋四十有七世而後有周文王禹及稷契皆當唐堯之時史載契十四世而至成湯厥次僅是至叙稷十五世而至文王中間乃閱夏商二代所較者三十餘世疏脫甚矣繇堯舜至周文王千一百有餘載而其世云十五豈人理哉不啻實非后稷之子而公

劉乃商世之諸侯蓋當商家十葉之間故左氏云文武不先不甯而外傳乃謂夏氏之衰不甯始失官守婁敬亦言周自后稷封邵十有餘世而公劉避桀是公劉之去后稷已十餘世還當夏桀之時漢書匈奴傳云夏道衰公劉失其稷官竄於西戎師古以爲稷之曾孫而康成遂謂與太康並世豈不妄哉夏書紀帝世系云帝俊生稷稷生台璽台璽生叔均叔均爲田祖帝俊帝嚳之名也稷後既有台璽叔均則不甯不得爲稷子明矣第其世次久遠有不得盡見者單說略

卷之七

三十六

穆公言后稷勤周十五世而興世本史記所爲据者安知所謂興者不爲公劉也邪卽稽世本不甯而下至季歷已一十有七世矣何得謂十五世哉

夷齊冢廟在蒲之蒲阪首陽山之南馬融顏師古之說同而高誘乃以爲洛東北去二十里之首陽山杜預阮籍之徒咸以爲然更謂二子餓死在是卽今二山皆有夷齊冢廟九域志兩從之戴延之以爲疑按夷齊之蹤當在河東首山雷首也是爲中條一曰薄山一山九名卽萑山也據河南郡境界簿云城東北

十里首陽山上有首陽祠夷齊所居而黃太史猶以  
或者指武師度孟津二子叩馬而諫當以洛陽爲是  
夫首山之名所在固不一曹大家云在隴西而今隴  
西有地曰首陽東有烏鼠山謂之首陽而許叔重言  
首陽則正在遼西今遼之和順東實有山名首陽俱  
有祠廟其在吳郡亦有首山豈得徧爲據邪子曰伯  
夷叔齊餓於首陽之下又曰不降其志不辱其身伯  
夷叔齊歟注家亦云蒲阪陽區山者俗號首陽而黃  
子且以爲無餓死事按呂氏書夷齊如周至岐陽而

說略

卷之七

三十七

文王已沒武王卽位使叔旦就膠革於次四內盟曰  
加富三等就官一列又使召公就微子啓於共頭之  
下盟曰世爲長侯守商之祀相奉桑林宜思孟諸各  
爲三書同辭血之以牲埋其一以其一歸夷齊聞之  
相視而笑曰嘻異哉非吾所謂道也周見商之僻而  
遽爲之其治尚謀而行貨阻兵而保威割牲而盟以  
爲信揚夢以說衆殺伐以要利以此治商是以亂易  
暴也今天下聞周德衰與其並乎周以漫吾身不若  
避之以繁吾行二子乃北行至首陽山餓焉石曼卿

云死蒲阪者恥周之事而死於堯舜之區庶幾見揖  
異之風焉則亦非洛陽矣又孰有叩馬之事哉三秦  
記謂夷齊食薇三年顏色不變武王戒之不食而死  
而爾雅云芑白苗捷爲舍人以爲伯夷所食首陽之  
草也程晏以不食爲飽以失仁爲餒餓乃其飽死乃  
其生而李德裕且以聞媛不薇爲不智不義棄兄之  
祿不仁伊川程氏則謂止是不食其祿非餓不食聖  
言皦日而衆言猶不一惜哉

孤竹君墨台音眉怡見孔叢子注一作默台見路史

說略

卷之七

三十八

名初字子朝見韓詩外傳孤竹國名卽觚竹北海之  
孤山是也太史公伯夷傳曰伯夷叔齊孤竹君之二  
子也而不知孤竹君有三子曰伯夷名允一名元字  
公信乃元子曰伯遼名憑乃中子曰叔齊名致字公  
遠一作智字公達乃嫡子或曰夷齊謚也略見春秋  
少陽篇伯遼見周曇詠史詩注伯當作仲見吾衍閒  
居錄初欲立夷不可初薨夷齊偕異去之北海之瀕  
於是立憑或曰憑夷齊之弟一曰乃異母弟見烈士

傳

太公廟碑在衛州共縣晉太康十年立其文曰太公望者此縣人太康二年縣之西偏有盜發冢而得竹策之書書藏之年當秦坑儒之前八十六歲其周志曰文王夢天帝服玄襪以立於令狐之津帝曰昌賜汝望文王再拜稽首太公於後再拜稽首文王夢之夜太公夢之亦然其後文王見太公而訊之曰而名爲望乎畚曰唯文王曰吾如有所見太公言其日且述其言臣以此得見也文王曰有之遂與歸以爲卿士其紀年曰康王六年齊太公卒蓋壽一百一十歲

說略

卷之七

三十九

史記謂東海上人西伯與語大說曰自吾先君太公望子久矣故號之曰太公望又曰呂尚處世隱海濱西伯拘羑里散宜生閔天素知而招呂尚言尚所以事周雖異要之爲文武師蓋不得其詳乃廣徵異說其謂東海上人則得於孟子其先君望子則得於墨子至拘羑里則戰國辨士之論也灼龜而得兆立以爲師今緯書有之曾不知諸侯無太師而東海時避紂則得以爲卿士其說是也詩曰維師尚父則知爲武王師也竹書最古當魏安釐王時國史也所書宜



可信晉紀言咸寧五年盜發汲郡冢與此碑異知史誤也

西伯將出獵卜之曰所獲非龍非麇非虎非羆所獲霸王之輔於是果遇太公於渭水之陽載與俱歸此司馬遷之說也文王至磻谿見呂尚釣釣得玉璜刻曰姬受命呂佐檢德合於今昌來提此尚書大傳之說也太公釣於滋泉文王得而王此呂不韋之說也呂望年七十釣於渭渚初下得魴次得鯉剝腹得書書文曰呂望封於齊此劉向之說也太公避紂居東說略

卷之七

四十

海之濱聞文王作興曰盍歸乎來此孟子之說也其說之不同如此

嬾真子曰太公八十遇文王世所知也然宋玉楚詞曰太公九十乃顯榮東方朔云太公七十有二設謀於文武王林野客叢書云二說多有之不特此也如荀子曰舉太公於州人行年七十有二鄒子曰太公年七十而相周九十而封齊說苑曰呂望行年五十賣食于棘津行年七十屠牛朝歌行年九十爲天子師淮南子曰呂望年七十始學兵書九十佐武王伐

紂魏志尚父九十乘鹿鉞白詩曰七十遇文王此類甚多然太公遇文王之歲月無經典明文雜師謀注云文王既誅崇侯乃得呂尚於磻谿之厓是太公遇文王於伐崇之年書傳云散宜生南宮适闕天三子相與學於太公四人遂見西伯於姜里是太公遇文王於被囚之年史記齊世家曰西伯政平及斷虞芮之訟伐崇侯大作豐邑天下三分歸其二太公之謀居多則是太公歸周又在斷虞芮之前也左傳稱呂伋爲王舅則武王之后太公女也文王既得太公然不應是時方娶其女前已有考辯之

說略

卷之二

四十一

後以武王娶其女文王受命之年武王已八十二矣



